

NOS LEYNAN, NOS TRAHADORNAN DI LEY... Ay Ay Ay !!!

Ultimo dianan tur caminda e papiamento tabata riba e comerciante cu a gara e ladron y dune e lastra di su bida.

Si ami tabata juez, conociendo e joven comerciante aki, su trayectoria musical, su trayectoria como trahador, y su trayectoria como comerciante ultimo aña y pico, y sabiendo kico el a pasa aden pa por a yega na su negoshi, mantene esaki cu su sacrificio, pa e por a cuminsa logra su exito, mi lo ta tabata tin "un batata cayente den man", pa loke ta opinion publico, y un "snack" den cuchara pa loke ta ley.

E ultimo aki ta mas facil: "Ley ta ley! Ley pa un y tur".

Con mi lo balanza e dos puntonan aki como juez, mi no sa.

Mi no sa con e asunto aki ta para den ley, principalmente eCodigo penal nobo cu aparentemente ta duna ladron mas derecho cu su victima.

Pero den codigo penal (biewu) tabata tin un of otro articulo cu ta referi riba defensa di bo propiedad y bo familia y cu ta papia di "uitsluitingsgronden" y situacionnan di "hevige gemoedstoestanden", y tabata splica tambe defensa di bo propiedad, yiu nan y familia den bo cas.

Mi ta spera cu lo por tin un of otro jurista cu lo por lanta para y duna splicacion riba e asunto aki di cual tur hende ta bisa: "si bo defende bo mes y bo propiedad, bo ta bay cera si bo lesiona e ladron o intruso", y splica ki jurisprudencia tin riba e asunto aki.

FALTA DI CANTOR DI PUEBLO

E dianan aki mi a haya falta di e cantor di pueblo, Vicente Kelly.

Tur dia mi ta cambia di un emisora pa otro pa scucha kico Don Vicente ta bin cune riba Batimento di Ladron".

Mi a kere cu mi lo tende algo manera

"Ami ta un choller, ami ta ladron"

"Mi ta biba lekker"

"cu tur clase di pordon" etc.

Kizas Vicente su mente ta hopi ocupa e dianan aki preparando pa su "hit musical 98" cu nos lo scucha otro siman, den concurso di Tumba. Mi ta pordon'e pa e biaha aki.

COS CU TA SPANTA HENDE

Ultimo simannan a lesa hopi di bolsanan, mercado di balar, cu ta basha den otro rond di mundo; ta lesa di banconan cu ta cera porta y ta bati bancarota; ta lesa di miles di hende cu a perde tur cos y hasta di esnan cu "a pone man na nan bida."

Ora lesa esakinan, y djies pensa riba Aruba, si algo asina mester pasa bo ta haya un miedo grandi.

Aruba tin hopi pero hopi suerte ainda; Aruba ta un isla bendiciona den tur forma.

Un catastrofe den turismo ta caba cu Aruba pa semper; un catastrofe di un of otro manera cu decenas di victima, Aruba no por soporta y no por enfrenta; un catastrofe monetario, ta caba cu miles di hogar riba nos isla; un catastrofe bancario ta trece masha sufrimento cune y tambe lo ta funesto pa Aruba.

Si puntrami di e direccion pa futuro, lo mi tin cu ta negativo (manera custumber si mi bay tras di hende) y bisa cu "Aruba no ta e happy island" mas y desaroyonan mundial cu ta ser hereda sin cu nos kier, na Aruba lo haci nos un "very unhappy island" drentando 2000.

PAPEL DI WC TA HACI FALTA

Ultimo simannan mi a tende hopi reclamo di turistanan riba e mes un topico.

"Con un isla turistico manera Aruba por permiti cu den restaurantnan no tin papel di WC?"

Mi tin cu menciona aki, cu e nombrenan cu a cay ta riba restaurantnan cu nombrenan cu zonido italiano.

Tin otronan tambe di luho y di menos luho o turistico o menos turistico. E turistanan a keha di restaurantnan cu no tin papel di WC ni "tissue" nan por haya e ora ey, y keho di otronan ta cu bañonan ta tur sushi.

Pa esaki mi no por keda sin haci promocion pa Charlie's Bar e ora ey, pa drecha cara di nos isla cerca e turistanan, mustrandocu eynan bo ta sinta riba e "potchi" mes cu cuminda den man, saboreando bo

cuminda, admirando arte na muraya..... y asina limpi e lugar ta. Tambe mi a haya reclamo di lugarnan cu ta promove actividad, y ora cu nan reserva, y puntra si e actividad ta sigui awe noch, ta tende cu si.

Ora nan yega anochi pa bay come, y disfruta di e actividad, ta bin resulta cu no tin e actividad cu ta ser promovi.

Na Playa mes tin un "dori" cu aña nobo a perde hopi cliente cu a bin tende despues cu e banner pega pafo, no ta conta pa e anochi ey.

Pa nan mala suerte mi mes tabata para na pia di trapi y a scucha e cantidad di kehonan ora mi a bisa nan cu no tin "mariachi".

Eynan nan a cuminsa slek nan kehonan, y a ponemi corda riba e promocion cu tabata ser haci un tempo pa restaurant "El Mariachi" cu nunca a bini.

Turistanan tabata yama e restaurant, haya tende cu ta El Mariachi, pa despues resulta cu ta otro restaurant y no restaurant di "e mariachi".. Ta cosnan chiquito aki ta daña hopi pa nos.

E NO VOTADORNAN....PAKICO ?

Ultimo dianan mi a conversa cu varios persona cu a laga sa cu nan no a bay vota aña pasa.

E motibonan cu nan a duna ta varia, pero a bin cay riba e mes cos keto bay. Algun di e anotacionnan cu mi tin ta:

"Nos ta manera carné los riba Aruba", "nos no ta conta mas na Aruba", "Betico a lucha por nada pa nos Status Aparte", "Aruba no ta di Arubiano mas", "no tin justicia mas na Aruba", "despues di eleccion esnan cu a bishita bo cas no conoce bo mas", "gubernantenan no ta haci nada pa nos", "nos ta bendi cu Hulanda." Si e grupo aki sigui aumenta, ta con lo para cu Aruba drentando 2000. Esaki ta "e vision" cu nos partidonan politico mester tene cuenta cune pa 1 di januari 2000".

NOS POBER VIUDANAN ATROBE

Aunke cuanto gubernantenan grita di "nos grandinan" cu ta haya aumento di tanto, di "nos viudanan" cu ta ricibi aumento di tanto, semper e gruponan aki ta esnan cu ta haya nan mes, si no ta cu esaki, ta cu esaya.

Awe mi ta referi riba e pensioen pa viudanan.

Mi ta haya cu ta masha inhusto cu despues di tanto aña cu un viuda ta biba di 866 florin cu e ta ricibi, diripiente ta "pasa machete" den esaki, y ta bahe pa 688 florin.

Pero e machete so no ta suficiente, tin cu "pasa hacha" tambe pa traha mochi di e pensioen.

Ademas di a kita parti di e entrada, y haci esaki mas chiquito, bo tin cu tende cu ta bay kita mes ora tambe (auke poco poco) e cantidad di placa cu bo a haya di mas e añanan cu a pasa.

Motibo ta cu awor ta bay paga e pensioen di viuda segun edad, y ta kita e di mas cu terugwerkende kracht, esta retroactivo.

E persona cu ta cobra pensioen di viuda no por yuda cu BOSO A HACI UN FOUT... El a cobra su 866 florin pa añanan caba riba locual tabata stipula pa BOSO.

Ta inhusto cu awe ta reparti e pagamento di pensioen segun edad, y awor ta bay kita PLACA DI MAS PAGA.

Ni cu e 866 florin viudanan no por biba pa paga nan coriente, awa y necesidadnan, manda mucha school etc.

Corda awor cu ta bay paga 688 florin y ademas kita placa di nan pa ERRORNAN cu nan NO A COMETE.

Placa cu nan a custumbra cune y cu ni tabata yega.

E bunita di e asuntonan aki ta cu gubernantenan semper kier gaba cu logronan positivo (no ta importa di cual partido nan ta) pero ora di e penanan aki pa comunidad; ora tin e sucedidonan aki cu ta sali negativo, ningun di nan ta saca man pa busca con pa soluciona esaki pa esnan cu ta wordo perhudica.

Si e viuda kier reclama, e ta tende di ministro of hefe di departamento, "no ta cerca mi bo mester ta, cerca SVB".

Si e bay SVB e ta bin tende "ta gobierno a stipula..." y asina nan por sigui keha dia aden dia afo, sin cu un Parlamentario ta habri boca den Parlamento pa bisa: "Ta basta !! Cu mi partido kier of no, mi ta para tras di e viudanan y ta propone.....".

Esey pa mi ta un parlamentario MACHO

Juby